

საქართველოს მთავრობის

დადგენილება №207

2016 წლის 11 მაისი

ქ. თბილისი

„აწარმოე საქართველოში“ სახელმწიფო პროგრამის დამტკიცების შესახებ“ საქართველოს მთავრობის 2014 წლის 30 მაისის №365 დადგენილებაში ცვლილების შეტანის თაობაზე

მუხლი 1

„ნორმატიული აქტების შესახებ“ საქართველოს კანონის მე-20 მუხლის მე-4 პუნქტის შესაბამისად, „აწარმოე საქართველოში“ სახელმწიფო პროგრამის დამტკიცების შესახებ“ საქართველოს მთავრობის 2014 წლის 30 მაისის №365 დადგენილებაში (www.matsne.gov.ge, 03/06/2014, 240140000.10.003.017985) შეტანილ იქნეს ცვლილება და დადგენილებით დამტკიცებულ სახელმწიფო პროგრამას „აწარმოე საქართველოში“ დაემატოს შემდეგი შინაარსის I³ თავი:

„თავი I³

სახელმწიფო პროგრამის „აწარმოე საქართველოში“

შექმენი საქართველოში ნაწილი

მუხლი 12¹⁷. ტერმინთა განმარტება

სახელმწიფო პროგრამის „აწარმოე საქართველოში“ შექმენი საქართველოში ნაწილის მიზნებისათვის, ამ თავში გამოყენებულ ტერმინებს აქვთ შემდეგი მნიშვნელობა:

- ა) პროგრამა – სახელმწიფო პროგრამის „აწარმოე საქართველოში“ შექმენი საქართველოში ნაწილი;
- ბ) ინოვაციების სააგენტო – საქართველოს ეკონომიკისა და მდგრადი განვითარების სამინისტროს სისტემაში შემავალი საჯარო სამართლის იურიდიული პირი – საქართველოს ინოვაციების და ტექნოლოგიების სააგენტო;
- გ) სამრეწველო ინოვაციების ლაბორატორია (FABLAB) – ლაბორატორია, რომელიც თანამედროვე დაზღვა-დანადგარების (მათ შორის, 3D პრინტერის, 3D სკანერის, პროგრამირებადი ჩარხის, ლაზერული მჭრელის და ა.შ.) გამოყენების საშუალებით უზრუნველყოფს ინოვაციური და კრეატიული პროდუქტის შექმნას;
- დ) განაცხადი – საქართველოს მოქალაქე ფიზიკური პირის მიერ ინოვაციების სააგენტოსათვის ელექტრონული ფორმით მიმართვა, პროგრამაში მონაწილეობის მიღების მიზნით;
- ე) განმცხადებელი – საქართველოს მოქალაქე ფიზიკური პირი;
- ვ) სახელმწიფო გრანტი – სახელმწიფო პროგრამის „აწარმოე საქართველოში“ შექმენი საქართველოში ნაწილის მიზნებისათვის გაცემული თანხა;
- ზ) გრანტის მიმღები – განმცხადებელი, რომელმაც ამ დადგენილების შესაბამისად მიიღო სახელმწიფო გრანტი;
- თ) გუნდი – განმცხადებელთა გაერთიანება, რომელიც ერთიანი სახელწოდებით მონაწილეობს პროგრამაში;
- ი) პროგრამის ბენეფიციარი – პირი, რომელიც ამ პროგრამით დადგენილი პირობების შესაბამისად,



მონაწილეობს პროგრამაში როგორც პირველ, ასევე მე-2 ეტაპზე;

კ) პროექტი – ფიზიკური პირის მიერ, პროგრამის ფარგლებში, ინოვაციების სააგენტოსათვის წარდგენილ განაცხადში მითითებული ინფორმაციების ერთობლიობა, რომელიც მოიცავს შემდეგს:

კ.ა) ინფორმაციას პროექტის ავტორის შესახებ;

კ.ბ) ინფორმაციას პროექტის შესახებ;

კ.გ) პროექტის ხარჯთაღრიცხვას;

ლ) შესარჩევი კომისია – ინოვაციების სააგენტოს მიერ შექმნილი კომისია, რომელიც იღებს გადაწყვეტილებას განმცხადებლის პროგრამაში მონაწილეობის შესახებ.

მუხლი 12¹⁸. პროგრამის მიზანი და აღწერა

1. პროგრამის მიზანია სამრეწველო ინოვაციების ლაბორატორიების რესურსების გამოყენებით ინოვაციური პროდუქტის შექმნის ხელშეწყობა, საქართველოში მაღალი ტექნოლოგიების გამოყენებით წარმოების წახალისება, ინოვაციური მეწარმეობის უნარ-ჩვევების განვითარება და კონკურენტუნარიანობის გაზრდა. პროგრამა ხორციელდება 2 ეტაპად.

2. პირველი ეტაპის ფარგლებში ხდება:

ა) განცხადებების მიღება;

ბ) განმცხადებლების გადამზადება საჭიროებების შესაბამისად, ინოვაციების სააგენტოს მიერ მომზადებული შესაბამისი მიმართულების ტრენინგების მოდულების მიხედვით;

გ) შესარჩევი კონკურსისათვის მომზადების მიზნით, სატესტო რეჟიმში მონაწილეთა დაშვება სამრეწველო ინოვაციების ლაბორატორიებში პროტოტიპის შესაქმნელად;

დ) შესარჩევ კონკურსში მონაწილეობა.

3. შესარჩევი კომისიის მიერ მე-2 ეტაპზე გადასული პირებისათვის მე-2 ეტაპის ფარგლებში ხდება:

ა) მონაწილისათვის/გუნდისათვის მენტორის დანიშვნა;

ბ) მონაწილის/გუნდის შესაბამის სამრეწველო ინოვაციების ლაბორატორიაში უფასოდ დაშვება;

გ) საგრანტო დაფინანსება 200-დან 1000-ლარამდე, რომლის მიზანია პროდუქტის მასალის ხარჯების დაფარვა;

დ) პროგრამის ფარგლებში შექმნილი პროდუქციის რეალიზაციის ხელშეწყობა, რაც მოიცავს:

დ.ა) ბენეფიციარების მიერ შექმნილი პროდუქტის რეალიზაციისათვის გამოფენა-გაყიდვების ორგანიზებას;

დ.ბ) პროექტის კომერციალიზაციის მიზნით, ბენეფიციარების დაკავშირების ხელშეწყობას კერძო სექტორთან/პოტენციურ ინვესტორებთან (B2B).

მუხლი 12¹⁹. პროგრამის განმახორციელებელ სუბიექტთა უფლებამოსილება

1. პროგრამის კოორდინაციას და პროგრამით განსაზღვრული ღონისძიებების შესრულებაზე ზედამხედველობას ახორციელებს საქართველოს ეკონომიკისა და მდგრადი განვითარების სამინისტრო.

2. ინოვაციების სააგენტო:



- ა) ახორციელებს პროგრამის შესახებ ინფორმაციის მიწოდებას მოსახლეობისათვის;
 - ბ) აწარმოებს განაცხადების მიღებას;
 - გ) ამზადებს და აფორმებს გამარჯვებულ განმცხადებლებთან საგრანტო ხელშეკრულებას;
 - დ) აწარმოებს ბენეფიციარის მიერ საგრანტო ხელშეკრულების განხორციელების მონიტორინგს;
 - ე) პროგრამის ბენეფიციარების მონაცემთა აღრიცხვის მიზნით, ქმნის პროგრამის მონაცემთა ბაზას.
3. შესარჩევი კომისია იღებს გადაწყვეტილებას მე-2 ეტაპზე მონაწილეთა გადაყვანის შესახებ.

მუხლი 12²⁰. პროგრამის ბიუჯეტი და დაფინანსება

პროგრამის დაფინანსების წყაროა სახელმწიფო ბიუჯეტით ინოვაციების სააგენტოსათვის გათვალისწინებული ასიგნებები.“.

მუხლი 2

დადგენილება ამოქმედდეს გამოქვეყნებისთანავე.

პრემიერ-მინისტრი

გიორგი კვირიკაშვილი

